

【去看阿公阿婆】胡明華原作

愛轉去看阿公阿婆也，歸家人都當暢。前一暗晡阿爸阿姆緊吩咐阿立愛早早跣，做毋得韌床。因爭阿公阿婆戴在山林壁角肚，阿立一家人愛坐火車盤兩到車仔，再過行十過分鐘正會到，係講忒晝正出發，連食夜都可能赴毋著。

阿立盡好跣阿公公去屋脣个樹林捉蟲仔搞，書項有教个蟲仔，差毋多逐項都尋得著。虎毛蟲、草蟻仔、剪刀鉸、蝶仔、揚尾仔、花姑仔，愛尋毋驚尋無。

阿婆當惜阿立，見擺阿立轉來，佢就會訂工做菜粬仔分這個心肝仔食過願，菜粬仔就係佢兩子阿婆个秘密。阿婆毋知哪來个本等，總係揣得著這個心肝孫仔好麼个玩具，兩儕總會聘好下二擺阿婆愛送阿立麼个好搞个東西，阿立就怎樣望等兩子阿婆過再見面。

無想著，阿立這擺轉去，正如阿公前一駁仔無細義跌斷腳骨，這下愛怙怙杖仔正做得停動，連行路都毋自在咧。阿婆也手著傷，歸隻手包等藥膏，莫講落灶下做菜粬仔，連自家食東西都當艱辛。

阿公阿婆無法陪等搞也，阿立試著盡失望，一路翻山過嶺來尋阿公阿婆搞，結果嘎變怎樣。佢儘採問¹過人以後，就面臭臭仔囡入間房，毋聲毋氣謔些些仔²，佢越想就越毋甘願。

臨暗仔个時節，阿爸阿姆摺阿立喊出房間，佢等阿立開嘴，阿爸塞佢一隻袋仔，阿立打開來看，裡背係佢望想盡久个變形金剛，這擺做得展寶分同學看哩。

「你知這係阿婆手著傷以後訂工下山去買分你个無？」阿姆講。「吓？」阿立著下驚，想著自家毋掏阿婆个態度，感覺當見笑。

續下來阿爸又拿出一隻畜蟲仔用个盒仔，裡肚還有一隻雞油姑。阿立看咧試著面紅濟炸還較敗勢，頭犁犁仔細細聲問：「係阿公抑係阿婆買个？」阿爸講：「阿婆買个盒仔，若公自家捉个雞油姑！」

阿立越想越感覺無應該，佢想著阿公阿婆恁惜自家，著傷也還想等愛準備分自家个東西。顛倒係佢，淨知顧自家，完全無想著阿公阿婆著傷咧有幾艱苦。佢這下分醒哩，決定無愛做一個毋知人我个細強仔，等下就去同阿公阿婆會失禮，順續使妮一下，佢想：「麼人喊阿公阿婆恁惜佢呢？」

¹ 問：音 mun；此指對人打招呼。

² 謔些些仔：音 kien` zii` e；形容氣呼呼的樣子。